

Jü Carta San Pablota Títotau Ä Jiojtekähui

Teboteri

1 ¹Pablo Diosta saulero éntok Jesucristota apóstol, jume áapörík yeu púari Diostat ehuápamani, éntok jü lúturiata täyahuäpo jum emo jiokölihuä pámani. ²Jum jita jíba boobít-huäpo yü jíapsihuäpo. Jum Diosta kaa yore baytähuäpo, yore ä mak-rokkak, kee jee ániata yeu machiay náateka. ³Éntok taahuata yúmak ä täyatebok juka ä nooki, jume huatemmeu ä nokhuä pámani, ìri ín mampo toijri Diosta itom jínëukamta nésaupo. ⁴Titotahui, Cristota sáalhuäpo tua ín úusi, Diosta tü eäü, yore nak jiokölihuame, éntok yánti jíapsihuame, Dios Áchayta éntok Señor Jesucristota itom jinëukamta bétana.

Jume pastorim éntok obispom jachin ministerio tékilta bem yánakëhui

⁵Iäri béchibone isla Cretapo enchi tö siika, hua kaa tüisi huemta enchi rúuktianakë béchibo, éntok síme buere joarammet pastorim enchi joa íaaka, nesauta enchi ín makakä

pámani. ⁶Ìri, jü kaa turik bétana kaita át nok máchina, huépulak jíba jubnake, éntok Diosta súaleme úusinake, kaa turik bem joa bétanam kaa natuatunake éntok bem éäpo jíba jíapsihuäpo. ⁷Bueítuk úttea, jü obispo kaa türik bétana kaita at nok machiná Diosta tékil ä joapo kaa au buérialinake, kaa juënaratunake, kaa vino jilérotunake, kaa nássuäratunake, tómita kaa türik bétana huemta kaa úkulnake. ⁸Al-la ä joapo ára huatem mabetnake, tühuata naknake, éntok suámsi au núnake, lútula jíapsinake, santosi jíapsinake, ä jíápsäpo áapo au yüeka au yekanake, ⁹ara áamak ä tahuarianake juka nok lutüriata, ä majtíahuaka pámani, éntok ket ára ámeu noknákë, yore majtihuäpo kayta täbuiasi jípureka, éntok jume ä nok bėjreka nokame ahuä temaijtuaka ä tü etuana, jünehuamta am maknake.

¹⁰Bueítuk ketunem juebénaka aane, jume lútüriata nok bėj-reme, jume kia jájana jítat nokame, éntok yore baytähuame, éntok chë junne jume circuncisiónta

hueriame. ¹¹Úttea huamei tem páttiabéchibo; bueituk síme joamim jíapsi násonte kaa tühuaata am majtiaka, íkai joakam tómita yún koba báare.

¹²Senu áme násuk profeeta ínel jiaahua: “Jume cretapo joomem jíbam ára nókichi, animal kaa susuaram bénasim maachi, jibuaram, obëram.” ¹³Íri ä nokäu lútúria. Juari béchibo, kuttilasë ámeu nooka, juka Diostat ehuamta türik am jípunakë béchibo, ¹⁴kaa jume judíom cuentommet suánake, éntok huame yorémem nesauriachi, bueitukim lútúriata omoute.

¹⁵Síme chicha machirata kaa jipure, jume chicha machirata kaa jipureme béchibo, të huame jíapsi nasontulataka kaita súaleme béchibo, síme chicha maachi; bueituk jü bem éeri éntok jíapsi suära nasóntula.

¹⁶Diostam emo täya tíiya, të hua bem jita jóäubeyim ä omoute. Kujti machirata jípureka, Diosta bej-rekam jíapsa, jita türik júne kara joaka.

Jü lútúriata yore majtiahuame

2 ¹Të empo Akë ä nooka juka kaa täbuiasi huemta yore majtiahuamta. ²Jume yoiyöturim yúmalasim suamsi emo núnake, kaa yún nokaka, suamsi, emo yörihuäpo túlisi, Diostat ehuäpo kaa täbuiasi, emo nakhuäpo, éntok ára jita böbithuäpo. Jíapsina, áma yeu huée béchibo, jum kaa tühuaapo. ³Ínëli jume jamyóyölam, bem jíapsäpom yörisi machisi emo núnake,

kaabetat kia nokaka, vino jíhuame kaa am yuínake, tühuaatam ára majtianake; ⁴jume jáamuchim chë kaa yoiyöhuemim majtianake, bem kunam am náknakë béchibo, éntok bem asoam, ⁵éntokim suamsi emo nüyeka, kayta kaa türik joaka, bem joam am suayanakë béchibo, tü jíapsitam jípunake, bem kunam bëtukim emo am núnakë béchibo, bueituk Diosta nokíbet bette nokta kaa ä bétana noknä béchibo.

⁶Alë bénasi kétchi, jume jübua yoiyötume kuttilasë ámeu nooka: suamsi emo am nü sáhueka; ⁷símepë bat emo ketcha ejemplo, tekilpo türik joaka, yore majtiahuäpo, yúmalasë emo bittebo, éntok suamsi, ⁸nokta türipo éntok kara omouteta, bueituk jü ä béj-reka huéme ä tiunakë béchibo, éntok kaita juénak enchim bétana nok machik jípureka.

⁹Éntok jume saulerommehuë kuttílasí nooka, bem tékom bëtukim emo nüunake, símeku am türeu jonake, katim elaka am nok bejnake; ¹⁰kabeta baytahuaka jita ä ühuanake, ál-la símeku ä bitteboka lútula au núnake, bueituk símeku jü Diosta bétana yore majtiahuame itom jinëume üjyorisi bittunake.

¹¹Bueituk jü Diosta tü eäu áu bittebo, síme yoremem jínëuriata makbareka, ¹²ítom majtiaka, juka Diosta kaa yörihuau tojaka, éntok juka ániapo kaa türik úkulhuamta, juéna éerita tójaka, ímíte jíapsínake suamsi, lútula éntok Dios huáateka, ¹³juka tüisi

al-lehuäpo mabet-báahuanta boobíchaka, entok uyyorisi au yeu machirianakeme jü buere Dios, éntok Jesucristo itom jínëukamta, ¹⁴jü ito béchïbo au tojakame, sime kaa türiku itom jínëu báreka, éntok tossaala itom baksiaka ä pueblo attiaipo itom jípu báreka, éntok tü tékilta johuäpo naybuk-riata jípureka.

¹⁵Íkäre ámeu nooka, kuttílassi éntoke yäura úttiata jípureka kaa türi bem yáari am toij sáhue. Kaabe kaa kia kaitäpo enchi jipunake.

*Lútula jíapsi jipuhuame
Diosta tü eäpo*

3 ¹Amëhue am huatisauhue, jume gobierno tékilta jipureme entok yauram nesahueme áme bétuk emo am jipunakë béchïbo, nesautam jonake entokim at jiapseka tékilta jonake. ²Kaabetachim juënak noknake, katim nássuäleromtunake, ál-lam huatemmakim tülisi emo jipunake, simë yanti ehuamta bittteboka sime yoremem bíchäpo.

³Bueituk ítapo ket bannaataka kaa susuakay, katte Diosta nésaupo rejtey, chikturataka, sime juëna éerita bétuk ito jípureka. Kaa tühuapote jíapsay, éntok jita ito nat úkuleka, kaa bibit péehuaka, éntok huatem kaa bibit péaka. ⁴Të juka Dios itom jínëukamta tü ehuamta itou yeu machiako, éntok sime yoremem ä nákehui, ⁵itom jínëuk, kaa lútula huëpo tuhuata itom yáakä béchïbo, ál-la itom ä nak jiokolëpo, bajsiahuaka

bemélassi tomtihuäpo, entok Espíritu Santopo bemélassi ä yahuakapo. ⁶Jü, buéresi yüni itot ä chíbejtiakähui, Jesucristo itom jínëukamta bétana, ⁷bueituk lútula jíapsihumta ä tü eäpo jípureka, amakte herenciata jípureka tahua, yü jíapsihumta itom boobichä pámani.

⁸Íri nooki huitti lütüria, Íachiri katë kom eaka, kutti am téjhua, bueituk jume Diosta súaleme tü tekilpom jíba emo jipunake. Ímëri türimme, éntok yoremem ania. ⁹Të juka nokta kaa nau bataka huentta katë ä jikkaijbáare, entok juka nat tomti kat-huamta bétana kia nokhuamta, entok juka leyta bétana nau nok nássuahuamta, bueituk kia bejja entok kaitapo yore ania.

¹⁰Jü yoreme emo näikimtehuamta joamta, séjtuli entok guosa kuttílassi áu noksuka, pakunë yä tahuaria. ¹¹Juneate hua ínëli áu nasontekame, Diosta bejre, entok bette noki at chuppe, juka bette nokta at chupe béchïbo.

Jíta ä yánakeu bétana au nokak

¹²Artemasta ö Tíquicota émou nee bíttuako. Emo bamijtuaka pueblo Nicópolisipo inou yepsa, bueituk júmüne, sime séberia tiempopo tahua báreka eiya. ¹³Jü Zénas leyta yúmalasi täyame éntok Apoolojta, al-leake am boo tojja, kayta ámeu bínakë béchïbo. ¹⁴Jume itomak aanim am áraunakë béchïbo, jum tü tékilta johuäpo. Bueituk jume jita ámeu bëyemmehui am anianakë béchïbo; bueitukim ínëli huatem tuhuata joorianake.

Teboteri éntok ä chupëpo
Dioſta tü eähui

¹⁵Sime jume ínomak aneme

enchim tebotua. Jume Diostat
ehuäpo itom nakemë tebotua,
Dioſta tü eäu enchimmaktunake.
Júnentunake.